



**IÑISTORRA
BILTZARRA**



Iñistorra Biltzarrak ezagutzera eman berri du erabakia

JOKIN LIZEAGA URNIETAR PRESTU 2016

Uztailaren 13an egindako batzarrean hartu zuen erabakia Iñistorra Euskaltzaleen Biltzarrak. Aurtengo *Urnietar prestua* Jokin Lizeaga Mitxelena izango da, kirolari korrikalaria eta irakaslea, mendi lasterketetan urte gutxiren buruan ibilbide bikain bezain harrigarria lortu duena Euskal Herrian eta nazioarte mailan. Egun, mendi lasterketaren esparruan gutxi dira munduan urnietarraren maila ematen dutenak. Oso ezaguna da herrian baita ere, *Zanpatuz* izeneko mendi elkartearen sortzaile eta eragile nagusia delako, elkarte horri esker hainbat dira urnietar gazte eta helduak Euskal Herriko eta atzerrietako mendiak ezagutu eta izadiarekiko harremana egin ahal izan dutenak.

Urnietan jaio zen, 1979. urtean, Martin Lizeaga eta Maritxu Mitxelenaren semea. Oinarrizko ikasketak egiteko Azkorteako eskoletan ibili ondoren, batxilergoa Hernaniko Agustin Iturriaga institutuan burutu zuen eta ondoren Gasteizko SHEE/IVEF-en heziketa fisikoan lizentziatu zen 2002. urtean. Gaur egun, heziketa fisikoko irakasle gisa dihardu Lekarozko institutuan (Nafarroa).

Kirolari gisa ez zen, ordea, mendi korrikalari hasi, txirrindulari bezala baizik, 20 urte zituela *Cafés Aitona* taldean hasi baitzen eta bertan jardun zuen laupabost urtez. Ikasketak amaituko bazituen, baina, ezin zuen txirrindularitzak eskatzen zion denboraren menpe egon eta, jarraitu ezinik, utzi egin zuen. Mendia oso gustoko zuen eta Mikel Lejarreta adiskide urnietarra mendi lasterketa batean ikusi izanaren eraginez erabaki zuen berak ere kirol jardun horretan hastea. 2007. urtea zen. Geroztik, bere ibilbidea bikain bezain ikusgarria izan da.

Hueskan oportretan zela, Selva de Ozan egiten den *Boca del Infierno* lasterketan parte hartzea erabaki zuen eta ezustean bigarren sailkatu zen. Sailkapen horrek, mendi lasterketak izadiarekin duen harreman zuzenak eta ahalegin handia eskaini beharreko kirola izateak adorea eman zioten jarraitzeko eta azken bederatzi urteetan bere aurrerabidea ikusgarria izan da: ehundik gora probatan parte hartu du eta jada 2008. urtean, urtebete zeramala, Euskal Selektzioak deitu egin zuen Munduko txapelketan parte hartzeko. Geroztik beste bost aldiz deitu dute. Horrek bospasei lasterketa puntuagarritan parte hartzera behartzen zuen eta, horrela, lau urtetan mundu mailako sailkapeneko lehenengo 8 korrikalarien artean sailkatu da urnietarra.

Irabazi dituen lasterketen artean hiru nabarmenduko ditugu orain: 2009an Italiako Chaverton mendi maratoia (Dolomitetan) eta 2011n, Andorran Montcalm-eko mendi maratoia. Baita, Andorran egindako *Els 2900* izeneko 70 kilometroko mendi maratoia, 14 ordu eta 45 minututan irabazi zuena. Datu ikusgarriak kirol horren



IÑISTORRA
BILTZARRA



gogortasuna aintzat izanik. Etxera etorrira, Zegamako mendi maratoni ospetsuan bospasei aldiz parte hartu du eta sailkaturiko lehenengo euskalduna izan da azken urteetan. Adarramendiko lasterketa hirutan egin du eta bitan irabazi. Emaitza deigarri bezain bikainak bederatzi urteko jardunean, nolana ere, maiz bere buruari galdera eginarazten diotenak pena merezi ote duen kirolari etekina ateratzeko hainbeste denbora eskaini behar izatea. Garbi du Lizeagak izadiarekiko lotura horrek erakartzen duela gehien mendi lasterketan, gaztetandik bizi izan duena.

Alaba eta seme baten aita, hirugarrenaren zain daude orain Jokin eta Ainhoa emaztea. Hain zuzen ere, izadia eta mendi ingurunea belaunaldi berriei ezagutzera emateko aukera ematearren *Zanpatuz* elkarte sortu zuen Jokinek Urnietan, azken urteetan gazte zein helduentzako mendi ibilaldi eta txangoak antolatzen diharduena. Izadiarekiko eta mendiarekiko zaletasuna etxetik datorkio Jokini, baina baita beregan eragin handia izan zuen Iñaki Arantzadi zenarengandik, orain ia urtebete hil zen Urnietako erretoreak mendi irteera eta txangoak antolatu baitzituen garai batean herriko gazteentzat eta Jokinek oso gogoan ditu Pirineotara Iñakirekin batera egindakoak.

Beraz, laburtuz, *Urnietar Prestu 2016* saria erabaki duen epaimahaiak aintzakotzat izan dituen merezimenduak:

- ❖ Mendi lasterketen kirol jardunean, ahalmen eta gaitasun apartekoak eskatzen dituen horretan, oso urte gutxiren buruan, zehazki bederatzi urtetan, egindako ibilbide bikain bezain arrakastatsua, garaipenez eta lehen mailako lorpenez jositakoa, guztiz eredu garria gertatzen delako kirolari eta kirolzale ororentzat eta, baita ere, kirol horren gogortasuna ezagutzen duten guztientzat.
- ❖ Mendi lasterketan korrikalari gisa egin duen ibilbide horrek mundu mailako eredu eta erreferentzi bihurtu duelako Lizeaga urnietarra.
- ❖ Bere kirolari ibilbidea lehia hutsetik areago izadiarekiko eta naturarekiko ahalegin eta begirune harreman batean oinarritu duelako, izadia begirunez zaindu beharra aldarrikatuz.
- ❖ Izadiarekiko ezagutza eta begirunean belaunaldi gazteak izadiaren aberastasunera hurbiltzearen *Zanpatuz* elkarte Urnietan sortu eta beste herritar batzuekin batera eragin izanagatik.



**IÑISTORRA
BILTZARRA**



AURTEN URRIAREN BIAN

Aurten Iñistor jaia urriaren 2an ospatuko da Urnietan eta, jakina denez, jai horren bazkalosteko bertso saioa amaiturik eskuratzen zaio *Urnietar Prestu* izendatuari sariaren bizkar-zapia eta ziurtagiria. Beraz, Jokin Lizeagak urriaren 2an, arratsaldeko bostak aldera jasoko du, Jakutegi plazako olanape handian.

Gogoan izan behar da, bide batez, Jokinen aitak, Martin Lizeagak sari edo izendapen hau bera jaso zuela ere 2012. urtean Juanito Iguaranekin batera, Tolosako plazan jokatuak apustu gogoangarriaren 50. urteurrenean.

Iñistor jaiari sarituarekin batera Jakutegi plazako olanapean antolatzen den bazkarira joan nahi dutenek bazkarirako txartela eros dezakete (heldu zein haurrena) Kantoi eta Guria tabernetan. Dagoeneko salgai daude (25 eta 16 €).

2016, abuztuak 29.

